

**Aalisarneq pillugu Inatsisartut inatsisaata
allanngortinneqarneranik Inatsisartut inatsisaat
(Inuussutissarsiutigalugu aalisartunut isertitat
tamakkiisut pillugit piumasaqaatinik appartitsineq,
sinerissap qanittuani aalisariutit pisassanit
annerpaamik pigisinnaasaannik qaffaaneq, ukiumik
pisassiiffigineqartartumik eqaannerusumik
aaqqissuineq aammalu pisassat, pisat il.il. pillugit
paasissutissanik avammut saqqummiisinnaanermut
malittarisassat)**

§ 1.

Aalisarneq pillugu Inatsisartut inatsisaanni nr. 18, 31. oktober 1996-imeersumi kingullermillu inatsisartut inatsisaatigut nr. 6-ikkut 20. maj 1998-imeersukkut allanngortinneqartumi makku allanngortinneqarput:

1. § 6, imm. 3-imi nr. 4 ima allanngortinneqassaaq:

"4) Inuit pineqartut tamarmik qaammatsiutit ukiuini kingullerni marlunni inuussutissarsiuti- galugu aalisartuusimassapput, ukiunilu kingullerni marlunni, toqqakkatut suliaqartitaanermi isertitat ilanngaatigereerlugit, isertitaasa tamarmiusut ikinnerpaamik 50 %-ii inuussutissarsiutigalugu aalisarnermi isertinneqarsimassapput. Inuussutissarsiutigalugu aalisartuunermut nallersuunneqarput piniartutut, savaatilittut, tuttuutilittut assigisaannillu inuussutissarsiuteqarnerit."

2. § 15, imm. 4 ima allanngortinneqassaaq:

"Imm. 4. Ingerlatseqatigiiffiit imaluunniit inuit ataasiakkaat pisassiissutinit pigisanik aalisariutit ilaannut immikkoortunut sinerissamut qanittumi aalisartunut pisassiissutigineqartunit pisiortormikkut pisassiissutinit tamarmiusunit 10 %-ii qaangerlugit pigisaqalersinnaangillat."

3. § 21-imi imm. 1-ip tulliatut **imm. 2-tut** ilanngunneqassaaq:

"Imm. 2. "Naalakkersuisut malittarisassiorsinnaapput, umiarsuaatileqatigiit ukiumut pisassamin-nik nunguutsisimasut, aalisarnerminnik ingerlatiinnarsinnaangortillugit tamatumali kingorna pisarineqartut ukiumi pisassiivimmi tullermi umiarsuaatileqatigiiffimmut pisassiissutigineqartunit ilanngaatigineqartussanngorlugit. Tamatuma saniatigut naalakkersuisut malittarisassiorsinnaapput, umiarsuaatileqatigiit ukiumut pisassaminnik tamakkiinngitsoorsimasut, ukiup siuliani pisarinngitsuukkat amerlaqataannik ukiumi pisassiivimmi tullermi pisassiissutit ilaneqartartussanngorlugit."

Imm. 2 aamma 3 matuma kingorna imm. 3 aamma imm. 4-nngussapput.

4. § 25-mut ilanngunneqassaaq imm. 1-ip kingorna immikkoortutut nutaatut

"Imm. 2. Naalakkersuisut aalisarsinnaanermut akuersissutit pillugit paasissutissat tamanut nalunaarutigisinnaavaat taamatullu tamanut nalunaarutigisinnaavaat pisassinneqartut qanoq amerlatigisunik pisassinneqarsimanersut, tamatumunnga ilanngullugit pisassanit qanoq annertutigisumik pisaqartoqarsimanersoq, aalisarnerni pisassiissutit qummut killilernerqarsimatillugit. Taamatuttaaq Naalakkersuisut tamanut nalunaarutigisinnaavaat paasissutissat umiarsuarmiit umiarsuarmut nuussisarnermut tunngasut, angallatinik attartornissanut paasissutissat aammalu akuersissutit allat tunniunneqartut una inatsit tunngavigalugu nalunaarutilluunniit uuma inatsisip malittaatut atuuttussanngortinneqarsimasut tunngavigalugit."

§ 2.

Inatsisartut inatsisaat atuutilerpoq ulloq 1. december 2001.

Namminersornerullutik Oqartussat, 12. november 2001.

Jonathan Motzfeldt

/

Hans Enoksen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

